

摘藻堂四庫全書薈要

史部

欽定四庫全書薈要卷六千七百二十三 史部

明史卷一百三十

大學士張廷玉等奉 勅修

列傳第十八

吳良

康茂才

丁德興

耿炳文

郭英

華雲龍

韓政

仇成

張龍

吳復周武

胡海

張赫

華高

張銓

何真

吳良定遠人初名國興賜名良雄偉剛直與弟禎俱以
勇畧聞從太祖起濠梁並為帳前先鋒良能沒水偵探
禎每易服為間諜禎別有傳良從取滁和戰采石克太
平下漂水漂陽定集慶功多又從徐達克鎮江下常州

進鎮撫守丹陽與趙繼祖等取江陰張士誠兵據秦望
山良攻奪之遂克江陰即命為指揮使守之時士誠據
全吳跨淮東浙西兵食足江陰當其要衝枕大江扼南
北襟喉士誠數以金帛啗將士窺釁太祖諭良曰江陰
我東南屏蔽汝約束士卒毋外交毋納逋逃毋貪小利
毋與爭鋒惟保境安民而已良奉命惟謹備禦修飭以
敗敵功進樞密院判官士誠大舉兵來寇艤腫蔽江其
將蘇同僉駐君山指畫進兵良遣弟禎出北門與戰而

潛遣元帥王子明帥壯士馳出南門合擊大敗之俘斬甚衆敵宵遁尋復寇常州良遣兵從間道殲其援兵於無錫當是時太祖數自將爭江楚上流與陳友諒角大軍屢出金陵空虛士誠不敢北出侵尺寸地以良在江陰為屏蔽也良仁恕儉約聲色貨利無所好夜宿城樓枕戈達旦訓將練兵常如寇至暇則延儒生講論經史新學宮立社學大開屯田均徭省賦在境十年封疆宴然太祖常召良勞曰吳院判保障一方我無東顧憂功

甚大車馬珠玉不足旌其勞命學士宋濂等為詩文美之仍遣還鎮尋大發兵取淮東克泰州士誠兵復出馬馱沙侵鎮江巨艦數百泝江而上良戒嚴以待太祖親督大軍禦之士誠兵遁追至淳于門良出兵夾擊獲卒二千太祖詣江陰勞軍周巡壁壘歎曰良今之吳起也吳平加昭勇大將軍蘇州衛指揮使移鎮蘇州武備益修軍民輯睦進都督僉事移守全州洪武三年進都督同知封江陰侯食祿千五百石子世券四年討靖州綏

寧諸蠻五年廣西蠻判副征南將軍鄧愈帥平章李伯
昇出靖州討之數月盡平左右兩江及五溪之地移兵
入銅鼓五開收潭溪開太平殲清洞崖山之衆於銅關
鐵寨諸蠻皆震懼內附粵西遂平八年督田鳳陽十二
年齊王封青州王妃良女也遂命良往建王府十四年
卒於青年五十八贈江國公諡襄烈子高嗣侯屢出山
西北平河南練兵從北征帥蕃軍討百夷二十八年有
罪調廣西從征趙宗壽燕師起高守遼東與楊文數出

師攻永平燕王謀去高曰高雖怯差密文勇而無謀去
高文無能為也乃遺二人書盛譽高極詆文故易其函
授之二人得書並以聞建文帝果疑高削爵徙廣西獨
文守遼東竟敗永樂初復召高鎮守大同上言備邊方
畧八年帝北征班師高稱疾不朝被劾廢為庶人奪券
洪熙元年帝見高名曰高往年多行無禮其謫戍海南
高已死徙其家會赦得釋宣德十年予昇乞嗣不許
康茂才字壽卿蘄人通經史大義事母孝元末寇亂陷

靳結義兵保鄉里立功自長官累遷淮西宣慰司都元帥太祖既渡江將士家屬留和州時茂才移戍采石扼江渡太祖遣兵數攻之茂才力守常遇春設伏殲其精銳茂才復立寨天寧洲又破之奔集慶太祖克集慶乃帥所部兵降太祖釋之命統所部從征明年授秦淮翼水軍元帥守龍灣取江陰馬駝沙敗張士誠兵獲其樓船從廖永安攻池州取樅陽太祖以軍興民失農業命茂才為都水營田使仍兼帳前總制親兵左副指揮使

陳友諒既陷太平謀約張士誠合攻應天太祖欲其速
來破之知茂才與友諒有舊命遣僕持書給為內應友
諒大喜問康公安在曰守江東木橋使歸太祖易橋以
石友諒至見橋愕然連呼老康莫應退至龍灣伏兵四
起茂才合諸將奮擊大破之太祖嘉茂才功賜賚甚厚
明年太祖親征友諒茂才以舟師從克安慶破江州友
諒西遁遂下蘄州興國漢陽沿流克黃梅寨取瑞昌敗
友諒八指揮降士卒二萬人遷帳前親兵副都指揮使

攻左君弼廬州未下從援南昌戰彭蠡友諒敗死從征

武昌皆有功進金吾侍衛新軍都護從大將軍徐達再

攻廬州克之取江陵及湖南諸路改神武衛指揮使進

大都督府副使士誠攻江陰太祖自將擊之比至鎮江

士誠已焚瓜洲遁茂才追北至浮子門吳軍遮海口乘

潮來薄茂才力戰大敗之搗淮安馬邏巷拔其水寨淮

安平尋拔湖州進逼平江士誠遣銳卒迎關大戰尹山

橋茂才持大戟督戰盡覆敵衆與諸將合圍其城軍齊

門平江下還取無錫遷同知大都督府事兼太子右率

府使洪武元年從大將軍經畧中原取汴洛留守陝州

規運饋餉造浮橋渡師招徠絳解諸州扼潼關秦兵不

敢東向茂才善撫綏民立石頌德焉三年復從大將軍

征定西取興元還軍道卒追封蘄國公諡武康子鐸年

十歲入侍皇太子讀書大本堂以父功封蘄春侯食祿

一千五百石子世恭八年督民墾田鳳陽征辰州蠻平

施疊諸州從大將軍達北征又從征南將軍傅友德征

雲南克普定破華楚山諸砦卒於軍年二十三追封斬
國公謚忠愍子淵幼未襲授散騎舍人已坐事革冠服
勒居山西遂不得嗣弘治末錄茂才後為世襲千戶

丁德興定遠人歸太祖於濠偉其狀貌以黑丁呼之從
取洪山寨以百騎破賊數千盡降其衆從克滁和敗青
山盜從渡江拔采石取太平分兵取溧水溧陽皆先登
從破曼濟哈雅水砦搗方山營禽陳兆先下集慶取鎮
江以功進管軍總管下金壇廣德寧國從平常州擢左

翼元帥寧國復叛從胡大海復之分兵下江陰取徽州
石埭池州樅陽攻江州移兵擊安慶所向皆捷復援江
陰畧江西傍近州縣攻雙刀趙挫其鋒時徐達邵榮攻
宜興久不下太祖遣使謂曰宜興城西通太湖口士誠
餉道所由斷其餉則必破達乃遣德興絕太湖口而并
力急攻城遂拔論功授鳳翔衛指揮使陳友諒犯龍江
德興軍於石灰山力戰擊敗之遂從征友諒搗安慶克
九江援安豐敗呂珍走左君弼從戰鄱陽平武昌克廬

州畧定湖南衡州諸郡又從大將軍收淮東征浙西敗
士誠兵於舊館下湖州圍平江卒於軍贈都指揮使洪
武元年追封濟國公列祀功臣廟子忠龍江衛指揮使
予世襲

耿炳文濠人父君用從太祖渡江積功為管軍總管援
宜興與張士誠兵爭柵力戰死炳文襲職領其軍取廣
德進攻長興敗士誠將趙打虎獲戰船三百餘艘禽其
守將李福安等遂克長興長興據太湖口陸通廣德與

宣歙接壤為江浙門戶太祖既得其地大喜改為長安
州立永興翼元帥府以炳文為總兵都元帥守之溫祥
卿者多智數避亂來歸炳文引入幕府畫守禦計甚悉
張士誠左丞潘元明元帥嚴再興帥師來爭炳文奮擊
大敗去久之士誠復遣司徒李伯昇帥衆十萬水陸進
攻城中兵七千太祖患之命陳德華高費聚往援伯昇
夜剗營諸將皆潰炳文嬰城固守攻甚急隨方禦之不
解甲者月餘常遇春復帥援兵至伯昇棄營遁追斬五

千餘人其明年改永興翼元帥府為永興衛親軍指揮使司以炳文為使已而士誠大發兵遣其弟士信復來爭炳文又敗之獲其元帥宋興祖士信憤甚益兵圍城炳文與費聚出戰又大敗之長興為士誠必爭地炳文拒守凡十年以寡禦衆大小數十戰戰無不勝士誠迄不得逞大軍伐士誠炳文將所部克湖州圍平江吳平進大都督府僉事從征中原克山東沂嶧諸州下汴梁徇河南扈駕北巡已又從常遇春取大同克晉冀從大

將軍徐達征陝西走李思齊張思道即鎮其地浚涇陽
洪渠十萬餘丈民賴其利尋拜秦王左相都督僉事洪
武三年封長興侯食祿千五百石子世券十四年從大
將軍出塞破元平章魯爾布哈於北黃河十九年從賴
國公傅友德征雲南討平曲靖蠻二十一年從永昌侯
藍玉北征至捕魚兒海二十五年帥兵平陝西徽州妖
人之亂三十年以征西將軍禽蜀寇高福興俘三千人
始炳文守長興功最高太祖榜列功臣以炳文附大將

軍達為一等及洪武末年諸公侯且盡存者惟炳文及武定侯郭英二人而炳文以元功宿將為朝廷所倚重建文元年燕王起兵帝命炳文為大將軍帥副將軍李堅寗忠北伐時年六十有五矣兵號三十萬至者惟十三萬八月次真定分營滹沱河南北都督徐凱軍河間潘忠楊松駐鄭州先鋒九千人駐雄縣值中秋不設備為燕王所襲九千人皆死忠等來援過月漾橋伏發水中忠松俱被執不屈死鄭州陷而炳文部將張保者降

燕備告南軍虛實燕王縱保歸使張雄鄭敗狀謂北軍

且至於是炳文移軍盡渡河並力當敵軍甫移燕兵驟

至循城蹴擊炳文軍不得成列敗入城爭門門塞蹈藉

死者不可數計燕兵遂圍城炳文衆尚十萬堅守不出

燕王知炳文老將未易下越三日解圍還而帝驟聞炳

文敗憂甚太常卿黃子澄遂薦李景隆為大將軍乘傳

代炳文比至軍燕師已先一日去炳文歸景隆代將竟

至於敗燕王稱帝之明年刑部尚書鄭賜都御史陳瑛

劾炳文衣服器皿有龍鳳飾玉帶用紅鞋僭妄不道炳文懼自殺子璿前軍都督僉事尚懿文太子長女江都公主炳文北伐璿嘗勸直搗北平炳文受代歸不復用璿憤甚永樂初杜門稱疾坐罪死璿弟瓖後軍都督僉事與江陰侯吳高都指揮楊文帥遼東兵圍永平不克退保山海關高被間徙廣西文守遼東瓖數請攻永平以動北平文不聽後與弟尚寶司卿瑄皆坐罪死

郭英鞏昌侯興弟也年十八與興同事太祖親信令值

宿帳中呼為郭四從克淦和采石太平征陳友諒戰鄱
陽湖皆與有功從征武昌陳氏驍將陳同僉持槩突入
太祖呼英殺之衣以戰袍攻岳州敗其援兵還克廬州
襄陽授驍騎衛千戶克淮安濠州安豐進指揮僉事從
徐達定中原又從常遇春攻太原走庫庫下興州大同
至沙淨州渡河取西安鳳翔鞏昌慶陽追敗賀宗哲於
亂山還本衛指揮副使進克定西討察罕諾爾克登寧
州斬首二千級進河南都指揮使時英女弟為寧妃英

將赴鎮命妃餞英於第賜白金二十罌廐馬二十匹在
鎮綏輯流亡申明約束境內大治九年移鎮北平十三
年召還進前軍都督府僉事十四年從潁川侯傅友德
征雲南與陳桓胡海分道進攻赤水河路久雨河水暴
漲英斬木為筏乘夜濟比曉抵賊營賊大驚潰禽烏撒
并阿容等攻克曲靖陸涼越州關索嶺椅子寨降大理
金齒廣南平諸山寨十六年復從友德平蒙化鄧川濟
金沙取北勝麗江前後斬首一萬三千餘級生禽二千

餘人收金甲數萬船千餘艘十七年論平雲南功封武
定侯食祿二千五百石予世券十八年加靖海將軍鎮
守遼東二十年從大將軍馮勝出金山納克楚降進征
虜右副將軍從藍玉至捕魚兒海師還賞賚甚厚遣還
鄉明年召入京命典禁兵三十年副征西將軍耿炳文
備邊陝西平沔縣賊高復興及還御史裴承祖劾英私
養家奴百五十餘人又擅殺男女五人帝弗問僉都御
史張春等執奏不已及命戚里大臣議其罪議上竟宥

之建文時從耿炳文李景隆伐燕無功燕王即位罷歸
第永樂元年卒年六十七贈營國公謚威襄英孝友通
書史行師有紀律以忠謹見親於太祖又以寧妃故恩
寵尤渥諸功臣莫敢望焉子十二人鎮尚永嘉公主銘
遼府典寶鏞中軍右都督女九人二為遼郅王妃女孫
為仁宗貴妃銘出也以故銘子珰得嗣侯宣德中珰署
宗人府事奪河間民田廬又奪天津屯田千畝罪其奴
而宥珰英宗初永嘉公主乞以其子珍嗣侯珍英嫡孫

也授錦衣衛指揮僉事玆卒子聰與珍爭嗣遂並停襲

亦授聰如珍官天順元年珍子昌以詔恩得襲聰爭之

不得昌卒子良當嗣聰又言良非昌子復停嗣授指揮

僉事以屢乞嗣下獄尋釋復官既而郭宗人共乞擇英

孫一人嗣英爵廷臣皆言良本英嫡孫宜嗣侯詔可正

德初卒子勛嗣勛桀黠有智數頗涉書史正德中鎮兩

廣入掌三千營世宗初掌團營大禮議起勛知上意首

右張璫世宗大愛幸之勛怙寵頗驕恣大學士楊一清

惡之因其賕請事覺罷營務奪保傅官階一清罷仍總
五軍營董四郊興造明年督團營十八年兼領後府從
幸承天請以五世祖英侑享太廟廷臣持不可侍郎唐
胄爭尤力帝不聽英竟得侑享其明年獻皇稱宗入太
廟進勛翊國公加太師先是妖人李福達自言能化藥
物為金銀勛與相暱福達敗力持其獄廷臣多得罪者
至是復進方士段朝用云以其所化金銀為飲食器可
不死帝益以為忠給事中戚賢劾勛擅作威福網利虐

民諸事李鳳來等復以為言下有司勘勛京師店舍多至千餘區副都御史胡守中又劾勛以族叔郭憲理刑東廠肆虐無辜帝置勿治會帝用言官言給勛敕與兵部尚書王廷相遂安伯陳璉同清軍役敕具勛不領言官劾其作威植黨勛疏辯有何必更勞賜敕語帝乃大怒責其強悖無人臣禮於是給事中高時盡發勛奸利事且言交通張延齡帝益怒下勛錦衣獄二十年九月也尋諭鎮撫司勿加刑訊奏上當勛死罪帝令法司覆

勘而給事中劉大直復劾勛亂政十二罪請併治法司
乃盡實諸疏中罪狀當勛罪絞帝令詳議法司更當勛
不軌罪斬沒入妻孥田宅奏上留中不下帝意欲寬勛
屢示意指而廷臣惡勛甚謬為不喻者更坐勛重辟明
年考察言官特旨貶高時二級以風廷臣廷臣終莫為
勛請其冬勛死獄中帝憐之責法司淹繫褫刑部尚書
吳山職侍郎都御史以下醵降有差而免勛籍沒僅奪
誥券而已自明興以來勲臣不與政事惟勛以挾恩寵

擅朝權恣為姦慝致敗勛死數年其子守乾嗣侯傳至
曾孫培民崇禎末死於賊

華雲龍定遠人聚衆居韭山太祖起兵來歸從克滁和
為千夫長從渡江破采石水寨及方山營下集慶路生
禽元將得兵萬人克鎮江遷總管攻拔廣德戰舊館禽
湯元帥進右副元帥龍江之役雲龍伏石灰山接戰殺
傷相當雲龍躍馬大呼擣其中堅遂大敗友諒兵乘勝
復太平從下九江南昌分兵攻下瑞州臨江吉安從援

安豐戰彭蠡平武昌累功至豹韜衛指揮使從徐達帥
兵取高郵進克淮安遂命守之改淮安衛指揮使尋攻
嘉興降吳將宋興圍平江軍於胥門從大軍北征徇下
山東郡縣與徐達會師通州進克元都擢大都督府僉
事總六衛兵留守兼北平行省參知政事踰年克雲州
獲元平章哈喇哈達右丞哈哈進都督同知兼燕王左
相洪武三年冬論功封淮安侯祿一千五百石子世券
雲龍上言北平邊塞東自永平薊州西至灰嶺下隘口

一百二十一相去可二千二百里其王平口至官坐嶺
隘口九相去五百餘里俱衝要宜設兵紫荆關及蘆花
山嶺尤要害宜設千戶守禦所又言前大兵克永平留
故元八翼軍士千六百人屯田人月支糧五斗所得不
償費宜入燕山諸衛補伍操練俱從之行邊至雲州襲
元平章僧嘉努營於英圖突入其帳禽之盡俘其衆至
上都大石崖攻克劉學士諸寨魯爾國公奔漠北自是
無內犯者威名大著建燕邸增築北平城皆其經畫洪

武七年有言雲龍據元相托克托第僭用故元宮中物
召還命何文輝往代未至京道卒子中襲李文忠之卒
也中侍疾進藥坐貶死二十三年追論中胡黨爵除
韓政睢人嘗為義兵元帥帥衆歸太祖授江淮行省平
章政事李濟據濠州名為張士誠守實觀望太祖使右
相國李善長以書招之不報太祖歎曰濠吾家也濟如
此我有國無家可乎乃命政帥指揮顧時以雲梯礮石
四面攻濠濟度不能支始出降政歸濟於應天太祖大

悅以時守濠州政從徐達攻安豐扼其四門潛穴城東
龍尾壩入其城二十餘丈城壞遂破之元將錫都珠占
左君弼皆走追奔四十餘里禽錫都俄而珠占來援與
戰城南門再破走之淮東西悉平已從大軍平吳又從
北伐降梁城守將盧斌分兵扼黃河斷山東援軍遂取
益都濟寧濟南皆有功克東平功尤多改山東行省平
章政事以師會大將軍於臨清檄政守東昌既下大都
命政分兵守廣平政遂諭降白土諸寨移守彰德下蟻

尖寨蟻尖者在林慮西北二十里為元右丞吳庸王居
義小蘇爾所據大將軍之北伐也遣將士收復諸山寨
降者相繼蟻尖獨恃險不下至是兵逼之庸誘殺居義
及小蘇爾以降得士卒萬餘人尋調征陝西還兵守禦
河北洪武三年封東平侯祿千五百石予世券移鎮山
東未幾復移河北招撫流民復業甚衆從左副將軍李
文忠擣應昌至臚胸河文忠深入令政守輜重還命巡
河南陝西再從信國公湯和練兵於臨清十一年二月

卒帝親臨其喪追封鄆國公子勲襲二十六年坐藍黨
誅爵除

仇成含山人初從軍充萬戶屢遷至秦淮翼副元帥太
祖攻安慶敵固守不戰廖永忠張志雄破其水寨成以
陸兵乘之遂克安慶初元左丞余闕守安慶陳友諒將
趙普勝陷之友諒既殺普勝元帥余某者襲取之張定
邊復來犯余帥走死至是以成為橫海指揮同知守其
地時左君弼據廬州羅友賢以池州叛無為知州董曾

陷死四面皆賊境成撫集軍民守禦嚴密漢兵不敢東下從征鄱陽殲敵涇江口功最征平江敗張士誠兵於城西南洪武三年僉大都督府事鎮遼東久之以屯戍無功降永昌衛指揮使尋復官十二年論藍玉等征西功當封帝念成舊勲先封為安慶侯歲祿二千石二十一年充征南副將軍討平容美諸峒復從大軍征雲南功多予世券加祿五百石二十一年七月有疾賜內醢手詔存問卒贈皖國公謚莊襄子正襲爵

張龍濠人從渡江定常州寧國婺州皆有功從征江州
為都先鋒平武昌授花槍所千戶從平淮東守禦海安
與張士誠將戰於海口禽彭元帥俘其卒數百進攻通
州擊斬賊將擢威武衛指揮僉事從平山東河南大兵
克潼關以龍為副留守洪武三年調守鳳翔改鳳翔衛
指揮賀宗哲悉衆圍城龍固守宗哲攻北門龍出兵搏
戰矢傷右脇不為動遂大敗之進克鳳州禽李參政等
二十餘人大將軍達入沔州遣龍別將一軍由鳳翔入

連雲棧攻興元降其守將劉思忠蜀將吳友仁來犯龍
擊却之友仁復悉兵薄城大治攻具龍從北門突出繞
友仁軍後敵盡棄甲仗走自是不復窺興元召僉大都
督府事十一年副李文忠征西番洮州論功封鳳翔侯
祿二十石世指揮使復從傅友德征雲南鎮七星關破
大理鶴慶平諸洞蠻加祿五百石予世券二十年從馮
勝出金山降納克楚明年勝調降軍征雲南次常德叛
去龍追至重慶收捕之二十三年春同延安侯唐勝宗

督屯田於平越鎮遠貴州議置龍里衛都勻亂佐藍玉討平之以老疾請告三十年卒子麟尚福清公主授駙馬都尉孫傑侍公主京師永樂初失侯傑子嗣宣德十年援詔恩乞嗣吏部言龍侯不嗣者四十年不許

吳復字伯起合肥人少負勇畧元末集衆保鄉里歸太祖於濠從克泗滁和采石太平累官萬戶從破曼濟哈雅水寨定集慶從徐達攻鎮江斬元平章鼎鼎下丹陽金壇克常州進統軍元帥徇江陰無錫還守常州張士

誠兵奄至力戰敗之追奔至長興連敗之於高橋太湖
及忠節門士誠奪氣從援安豐平武昌從徐達克廬州
下漢沔荆諸郡縣授鎮武衛指揮同知守沔陽從常遇
春下襄陽別將破安陸禽元同僉任亮遂守之克汝州
魯山洪武元年授懷遠將軍安陸衛指揮使悉平鄖均
房竹諸山寨之不附者三年從大將軍征陝西敗庫庫
禽其將又敗庫庫於秦州征土番克和州援漢中拔南
鄭明年從傅友德平蜀又明年從鄧愈平九溪辰州諸

蠻克四十八洞還守安陸七年進大都督府僉事巡北

平還授世襲指揮使十一年從沐英再征西番禽三副
使遂得納鄰七站之地明年師還論功封安陸侯食祿
二千石十四年從傅友德征雲南克普定城水西充總
兵官勦捕諸蠻遂由關索嶺開箐道取廣西十六年克
墨定苗至吉刺堡築安莊新城平七百房諸寨斬獲萬
計轉餉盤江是年十月金瘡發卒於普定追封黔國公
謚威毅加祿五百石予世券復臨陣奮發衝犯矢石體

無完膚平居恂恂口不言征伐事在普定買妾楊氏年
十七復死視殮畢沐浴更衣自經死封貞烈淑人子傑
嗣屢出山陝河南北平練兵從征二十八年有罪從征
龍州建功自贖建文中帥師援真定戰白溝河失律謫
南寧衛指揮使永樂元年子璟乞嗣正德間再三乞皆
不許弘治六年璟孫鐸援詔乞嗣亦不許十八年錄復
子孫世職千戶初與復以征西番功侯者又有周武武
開州人從定江東滅漢收淮東平吳積功為指揮僉事

從定中原進都督僉事洪武十一年以參將從沐英討西番朶甘以功封雄武侯祿二千五百石世指揮使出理河南軍務巡撫北邊二十三年卒贈汝國公諡勇襄胡海字海洋定遠人嘗入土豪赤塘王總管營自拔來歸授百戶從敗元將賈魯兵克泗滁進萬戶從渡江拔曼濟哈雅水寨破陳額森兵從取集慶鎮江敗元將謝國璽於寧國選充先鋒從大軍圍湖州墮其東南門月城從攻宜興下婺州鏖戰紹興生得賊四百餘人進都

先鋒又從戰龍江克安慶與漢人相持八戰皆大捷遂
入江州從徐達攻廬州皆有功海驍勇屢戰屢傷手足
胸腹間金瘡皆遍而鬪益力士卒從之者無不激勵自
効太祖壯之授花槍上千戶復從大軍克荊澧衡潭擢
寶慶衛指揮僉事遷指揮使命鎮益陽從平章楊璟征
湖南廣西未下郡縣田祁陽進圍永州與守兵戰於東
鄉橋生得千萬戶四人以夜半先登拔之抵靖江戰南
門生得萬戶二人夜四鼓自北門八角亭先登功最命

為左副總兵勦平左江上思蠻調征蜀克龍伏臨天門
山及溫湯關予世襲指揮使仍鎮益陽武岡靖州五開
諸苗蠻先後作亂悉捕誅首亂而撫其餘衆遷都督僉
事十四年從征雲南由永寧趨烏撒進克可渡河與副
將軍沐英會師攻大理敵悉衆扼上下關定遠侯王弼
自洱水東趨上關英帥大軍趨下關而遣海以夜四鼓
取石門間道渡河繞點蒼山後攀大樹緣崖而上立旂
幟英士卒望見皆踴躍大呼敵衆驚擾英遂斬關入海

亦麾山上軍馳下前後夾攻敵悉潰走十七年論功封
東川侯祿二千五百石予世券踰三年以左參將從征
金山又二年以征南將軍討平澧州九溪諸蠻寇師還
乞歸鄉里厚賚金帛以行二十四年七月病疽卒年六
十三長子斌龍虎衛指揮使從征雲南過曲靖猝遇寇
中飛矢卒贈都督同知次玉坐監黨死次觀尚南康公
主為駙馬都尉未嗣卒宣德中公主乞以子忠嗣詔授
孝陵衛指揮僉事予世襲

張赫臨淮人江淮大亂團義兵以捍鄉里嘉山繆把頭
招之不往聞太祖起師衆來附授千戶以功進萬戶從
渡江所至攻伐皆預以功擢常春翼元帥守禦常州尋
從戰鄱陽攻武昌已又從大將軍伐張士誠進圍平江
諸將分門而軍赫軍閭門士誠屢出兵突戰屢挫其鋒
又從大軍克慶元并下溫台洪武元年擢福州衛都指
揮副使進本衛同知復命署都指揮使司事是時倭寇
出沒海島中乘間輒傳岸剽掠沿海居民患苦之帝數

遣使齎詔書諭日本國王又數絕日本貢使然竟不得倭人要領赫在海上久所捕倭不可勝計最後追寇至琉球大洋與戰禽其魁十八人斬首數十級獲倭船十餘艘收弓刀器械無算帝偉赫功命掌都指揮印尋調興化衛召還擢大都督府僉事會遼東漕運艱軍食後期帝深以為慮以赫習海道命督海運事久之封航海侯食祿二千石予世券前後往來遼東十二年凡督十運勞勩備至軍中賴以無乏病卒追封恩國公諡莊簡

子榮從征雲南有功為水軍右衛指揮使孫鑑福建都指揮使永樂中留鎮交趾

華高和州人與俞通海等以巢湖水師來附從克太平授總管從破采石方山兵下集慶鎮江遷秦淮翼元帥與鄧愈徇廣德守將嚴兵城下高以數騎挑戰元兵堅壁不動高衝擊大破之遂取其城得兵萬人糧數千斛從平常州進僉行樞密院事副愈通海擊破趙普勝柵江營再敗陳友諒援長興克武昌授湖廣行省左丞帥

舟師從克淮東收浙西進行省平章政事洪武三年封
廣德侯歲祿六百石高性怯且無子請得宿衛有所征
討輒稱疾不行令練水師復以不習辭帝以故舊優容
之時諸勛臣多出行邊惟高不遣最後繕廣東邊海城
堡高請行帝曰卿復自力甚善四年四月事竣至瓊州
卒初有言高殖利者故歲祿獨薄至是貧不能葬帝憐
之命補支祿三百石以無子納誥券墓中贈巢國公謚
武莊授從子岳指揮僉事

張銓定遠人從取太平定積慶鎮江常州婺州擣江州
戰鄱陽湖取鄂渚收淮東平吳累功為指揮僉事從取
中原燕晉秦蜀進都督僉事使建齊王府事竣副江夏
侯周德興征五溪蠻已而水盡源通塔平散毛諸洞僉
作亂復副德興討平之從征雲南由永寧克烏撒久之
復從傅友德平烏撒及曲靖普定龍海孟定諸蠻洪武
二十三年封永定侯食祿千五百石世指揮使
何真字邦佐東莞人少英偉好書劍元至正初為河源

縣務副使轉淡水場管勾棄官歸元末盜起真聚衆保鄉里十四年縣人王成陳仲玉作亂真赴告元帥府帥受賂反捕真逃居坭岡舉兵攻成不克久之惠州人王仲剛與叛將黃常據惠真擊走常殺仲剛以功授惠陽路同知廣東都元帥守惠州海寇趙宗愚陷廣州真以兵破走之復其城擢廣東分省參政尋擢右丞贛州熊天瑞引舟師數萬欲圖真真迎之胥江天大雷雨折天瑞舟檣擊走之廣人賴以完先是真再攻成誅仲玉而

成卒固守二十六年復圍成募禽成者予鈔十千成奴
縛成以出真予之鈔命具湯鑊趨烹奴號於衆曰奴叛
主者視此緣海叛者皆降時中原大亂嶺表隔絕有勸
真效尉佗故事者不聽屢遣使由海道貢方物於朝累
進資德大夫行省左丞洪武元年太祖命廖永忠為征
南將軍帥舟師取廣東永忠至福州以書諭真遂航海
趨潮州師既至真遣都事劉克佐詣軍門上印章籍所
部郡縣戶口兵糧奉表以降永忠聞於朝賜詔褒真曰

朕惟古之豪傑保境安民以待有德若竇融李勣之屬
擁兵據險角立羣雄間非真主不屈此漢唐名臣於今
未見爾真連數郡之衆乃不煩一兵保境來歸雖竇李
奚讓焉永忠抵東莞真帥官屬迎勞遂奉詔入朝擢江
西行省參知政事且諭之曰天下分爭所謂豪傑有三
易亂為治者上也保民達變知所歸者次也負固偷安
身死不悔斯其下矣卿輸誠納土不逆顏行可謂識時
務者真頓首謝在官頗著聲望尤喜儒術讀書綴文已

轉山東參政四年命還廣東收集舊卒事竣仍莅山東
九年致仕大軍征雲南命真偕其子兵馬指揮貴往規
畫軍餉置郵驛還山西右布政使再與貴勾軍廣東擢
貴鎮南衛指揮僉事尋命真為浙江布政使改湖廣二
十年復致仕封東莞伯祿一千五百石子世恭卒子榮
嗣與弟貴及尚寶司丞宏皆坐藍黨死真弟迪疑禍及
已遂作亂擊殺南海官軍三百餘人遁入海島廣東都
司發兵討禽之伏誅

贊曰陳友諒之克太平也其鋒甚銳微茂才則金陵之
安危未可知矣吳良守江陰耿炳文守長興而吳人不
得肆其志締造之基其力為多至若華雲龍張赫吳復
胡海之屬或威著邊疆或功存海運塞旗陷陣所向皆
摧揆之前代功臣何多讓焉而又皆能保守祿位以恩
禮令終斯其尤足嘉美者歟

明史卷一百三十

欽定四庫全書

明史卷一百三十考證

吳良傳二十八年有罪調廣西從征趙宗壽

臣嚴福

按高之調廣西明功臣封爵考明書開國臣傳識大錄諸書均祇云有罪而不詳其坐累之由國史紀聞大政記亦不書此事考是年大誅藍黨或詞連吳良因罪及其子耶但別無考證謹識闕疑

吳良傳八年帝北征班師高稱疾不朝被劾廢為庶人

臣嚴福按功臣表吳高以永樂十二年十月以罪免此傳乃云八年被劾廢為庶人年月與表不合考永樂八年十二年俱有北征班師事史或因此而互異耳謹附識

康茂才傳謚武康 臣嚴福按康茂才謚法諸書互異開國臣傳明書識大錄則作武襄宋濂所撰茂才神道碑則作武義無作武康者惟明代紀事本末與史同謹附識

丁德興傳從取洪山寨以百騎破賊數千盡降其衆

臣嚴福按丁德興傳洪山寨以前先授萬戶見於識

大錄開國臣傳諸書考明書亦同史畧之謹識

耿炳文傳張士誠左丞潘元明臣嚴福按功臣封爵

考及開國臣傳均作潘原明不作元明與史小異但他書無可証者謹識闕疑

耿炳文傳扈駕北巡臣嚴福按耿炳文於洪武初年

授鎮國上將軍兼右率府副使獻徵錄開國臣傳所

載實同乃從北征時也史畧其官謹識

耿炳文傳尋拜秦王左相都督僉事

臣嚴福按炳文

拜秦王左相時仍兼陝西行省右丞見於獻徵錄開國臣傳史獨云都督僉事或別有所據謹識

郭英傳從克滌和采石太平征陳友諒戰鄱陽湖皆與有功臣嚴福按鄱陽之戰友諒中矢死有言郭英功者太祖問之謙不敢當太祖益重之考開國臣傳識大錄及楊榮所撰郭英神道碑皆以此事為英大

節史獨畧而不書謹附識

郭英傳討察罕諾爾克登寧州

臣嚴福按識大錄開

國臣傳英于洪武庚戌克登寧州後即陞本衛指揮
使賜金龍衣一襲次年辛亥始陞河南衛都指揮使
史畧之謹識

韓政傳追封鄆國公子勲襲

臣嚴福按獻徵錄政子

英為散騎舍人開國臣傳及明書錄大錄所載皆同
史獨云子勲襲坐藍黨誅未知何據謹識

仇成傳子正襲爵

臣嚴福按明書成子泰襲爵永樂

中考除按明功臣封爵考亦作泰不作正謹識

張龍傳傑子嗣

臣嚴福按明書作傑子綱明功臣封

爵考亦同史作傑子嗣彼此互異謹識

吳復傳二十三年卒贈汝國功謚武襄

臣嚴福按功

臣表周武卒子興襲指揮同知傳不書畧也謹附識

明史卷一百三十考證



總校官編修臣吳紹濬

欽定四庫全書薈要

史部
明史卷一百三十一至



詳校官員外郎臣楊世綸

欽定四庫全書薈要卷六千七百二十四 史部

明史卷一百三十一

大學士張廷玉等奉 勅修

傳第十九

顧時

吳禎

薛顯

郭興

陳德

王志

梅思祖

金朝興



唐勝宗

陸仲亨

費聚

陸聚

鄭遇春

黃彬

葉昇

顧時字時舉濠人。倜儻好奇畧。從太祖渡江。積功。由百夫長授元帥。取安慶。南昌。廬州。泰州。擢天策衛指揮同知。李濟據濠州。時從平章韓政討降之。攻張士誠。昇山水寨。引小舫繞敵舟。舟中多俯視而笑。時乘其懈。帥壯

士數人大呼躍入舟衆大亂餘舟競進五太子來援薛
顯又敗之五太子等降遂從大將軍平吳旋師取山東
洪武元年拜大都督府副使兼同知率府事從大將軍
定河南北浚牖以通舟師自臨清至通州下元都與諸
將分邏古北諸隘口從大軍取平陽克崞州獲逃將王
信等四十六人取蘭州圍慶陽張良臣耀兵城下擊敗
之獲其勁將九人良臣乃不敢復出慶陽平徐達還京
令時將騎兵畧靜寧州走賀宗哲西邊悉平三年進大

都督同知封濟寧侯祿千五百石子世券四年為左副將軍副傅友德帥河南陝西步騎伐蜀自興元進克階文敗蜀兵於漢川遂克成都明年副李文忠北征分道入沙漠迷失道糧且盡遇寇士疲不能戰時帥麾下數百人躍馬衝擊敵衆引去獲其輜重糧畜以歸軍聲大振六年從徐達鎮北平踰年召還八年復出鎮十二年卒年四十六葬鍾山追封滕國公諡襄靖祔祭功臣廟時能以少擊衆沉鷺不伐帝甚重之子敬金吾衛鎮撫

十五年嗣侯為左副將軍平龍泉山寇有功二十三年
追論胡惟庸黨榜列諸臣以時為首敬坐死爵除

吳禎江國襄烈公良弟也初名國寶賜名禎與良俱從
克滁和渡江克采石從定集慶下鎮江廣德常州宣城
江陰皆有功又從常遇春自銅陵取池州以舟師毀其
北門入城敵艦百餘至復大敗之遂克池州積功由帳
前都先鋒累遷為天興翼副元帥以千人助良守江陰
數敗吳兵破士誠水寨禽其驍將朱定授英武衛親軍

指揮使又大破吳兵於浮子門從大將軍徐達帥馬步
舟師取湖州勒奇兵出舊館大捷湖州平遂戍之從圍
平江破葑胥二門進僉大都督府事撫平江尋副征南
將軍湯和討方國珍乘潮入曹娥江毀壩通道出不意
直抵車廐國珍亡入海追及之盤嶼合戰自申至戌敗
之盡獲其戰艦士卒輜重國珍降復自海道進取福州
圍其西南水部三門一鼓克之洪武元年進兵破延平
禽陳友定閩海悉平還次昌國會海寇剗蘭秀山剿平

之兼率府副使尋為吳王左相兼兪大都督府事二年
大將軍平陝西還禎與副將軍馮勝駐慶陽三年討平
沂州答山賊命為靖海將軍練軍海上其冬封靖海侯
食祿千五百石予世券與秦晉二王傳金朝興汪興祖
並專傳王解都督府事仇成戍遼陽命禎總舟師數萬
由登州餉之海道險遠經理有方兵食無乏完城練卒
盡收遼海未附之地降平章高嘉努等坐事謫定遼衛
指揮使尋還七年海上有警復充總兵官命同都督兪

事於顯總江陰四衛舟師出捕倭至琉球大洋獲其兵
船獻俘京師自是常往來海道總理軍務數年海上無
寇十一年奉詔出定遼得疾輿還京師明年卒追封海
國公謚襄毅與良俱肖像功臣廟子忠嗣侯二十三年
追論禎胡惟庸黨爵除

薛顯蕭人趙均用據徐州以顯為元帥守泗州均用死
以泗州來降授親軍指揮從征伐南昌平命顯從大都
督朱文正守之陳友諒寇南昌顯守章江新城二門友

諒攻甚急顯隨方禦之間出銳卒搏戰斬其平章劉進
昭禽副樞趙祥固守三月乃解武昌既平鄧仲謙據新
淦不下顯討斬之因徇下未附諸郡縣以功擢江西行
省參政從徐達等收淮東遂伐張士誠與常遇春攻湖
州別將游軍取德清攻昇山水寨士誠遣其五太子盛
兵來援遇春與戰小却顯帥舟師奮擊燒其船衆大潰
五太子及朱暹呂珍等以舊館降得兵六萬人遇春謂
顯曰今日之戰將軍功遇春弗如也五太子等既降吳

人震恐湖州遂下進圍平江與諸將分門而軍吳平進
行省右丞命從大將軍徐達取中原瀕行太祖諭諸將
謂薛顯傅友德勇畧冠軍可當一面進克兗沂青濟取
東昌棣州樂安還收河南搗關陝渡河取衛輝彰德廣
平臨清帥馬步舟師取德州長蘆敗元兵於河西務又
敗之通州遂克元都分兵邏古北諸隘口畧大同獲喬
右丞等三十四人進征山西次保定取七垛寨追敗托
音特穆爾與友德將鐵騎三千畧平定西取太原走庫

庫降呼必瑪勒邀擊賀宗哲於石州拔白崖桃花諸寨
與大將軍達會平陽以降將杜旺等十一人見遂從入
關中抵臨洮別將攻馬鞍山西番寨大獲其畜產襲走
元豫王敗庫庫於寧夏復與達會師取平涼張良臣偽
以慶陽降顯往納之良臣蒲伏道迎夜刦顯營突圍免
良臣據城叛達進圍之庫庫遣哈扎噶爾攻原州以撓
明師顯駐靈州過之良臣援絕遂敗追賀宗哲於六盤
山逐庫庫出塞外陝西悉平洪武三年冬大封功臣以

顯擅殺胥吏獸醫火者馬軍及千戶吳富面數其罪封永城侯勿予券謫居海南分其祿為三一以贍所殺吳富及馬軍之家一以給其母妻令功過無相掩顯居海南踰年帝念之召還予世券食祿一千五百石復從大將軍征漠北數奉命巡視河南屯田北平練軍山西從魏國公巡北邊從宋國公出金山二十年冬召還次山海衛卒贈永國公諡桓襄無子弟綱幼二十三年追坐顯胡惟庸黨以死不問爵除

郭興一名子興濠人滁陽王郭子興據濠稱元帥興隸
麾下太祖在甥館興歸心焉軍行嘗備宿衛累功授管
軍總管進統軍元帥圍常州晝夜不解甲者七月城下
受上賞從攻寧國江陰宜興婺州安慶衢州皆下之戰
於鄱陽陳友諒連巨艦以進我師屢却興獻計以火攻
之友諒死從征武昌斬獲多進薦揚衛指揮使從徐達
取廬州援安豐大敗張士誠兵平襄陽衡澧還克高郵
淮安轉戰湖州圍平江軍於婁門吳平擢鎮國將軍大

都督府僉事洪武元年從達取中原克汴梁守禦河南
馮勝取陝州請益兵守潼關達曰無如興者遂調守之
潼關三秦門戶時哈瑪爾圖據奉元李思齊張思道等
相犄角日窺伺欲東向興悉力捍禦王左丞來攻大敗
之從徐達帥輕騎直擣奉元大軍繼進遂克之移鎮鞏
昌邊境帖然三年為秦王武傅兼陝西行都督府僉事
其冬封功臣興以不守紀律止封鞏昌侯食祿一千五
百石予世券四年伐蜀克漢川成都六年從徐達鎮北

平同陳德敗元兵於達喇海口十一年練兵臨清十六年巡北邊召還踰年卒贈陝國公諡武宣二十三年追坐胡惟庸黨爵除興女弟為寧妃弟英武定侯季弟德成性通敏嗜酒兩兄積功至列侯而德成止驍騎舍人大祖以寧妃故欲貴顯之德成辭帝不悅頓首謝曰臣性耽麪藥庸闇不能事事位高祿重必任職司事不治上殆殺我人生貴適意但多得錢飲醇酒足矣餘非所望帝稱善賜酒百罌金幣稱之寵遇益厚嘗侍宴後苑

此非酒過耶德成仰首曰臣猶厭之盡薙始快帝默然
既醒大懼佯狂自放剃髮衣僧衣唱佛不已帝謂寧妃
曰始以汝兄戲言今實為之真風漢也後黨事起坐死
者相屬德成竟得免

陳德字至善濠人世農家有勇力從太祖於定遠以萬
夫長從戰皆有功為帳前都先鋒同諸將取寧徽衛婺
諸城擢元帥李伯昇冠長興德往援擊走之從援南昌

大戰鄱陽湖禽水寨姚平章太祖舟膠淺德力戰身被
九矢不退從平武昌大敗張士誠兵於舊館擢天策衛
親軍指揮使吳平進僉大都督府事從大將軍北取中
原克元汴梁立河南行都督府以德署府事討平羣盜
征山西破澤州磨盤寨獲元參政喻仁遂會大軍克平
陽太原大同渡河取奉元鳳翔至秦州元守將呂國公
遁追禽之徐達圍張良臣於慶陽良臣恃兄思道為外
援間使往來德恣禽獲慶陽遂下又大破庫庫於古城

降其卒八萬洪武三年封臨江侯食祿一千五百石予
世券明年從潁川侯傅友德伐蜀分道入綿州破龍德
大敗吳友仁之衆乘勝拔漢州向大亨戴壽等走成都
追敗之遂與友德圍成都蜀平賜白金綵幣復還汴五
年為左副將軍與馮勝征漠北破敵於別畢道俘斬萬
計克甘肅取額齊訥路留兵扼關而還明年復總兵出
朔方敗敵三岔山禽其副樞實喇罕等七十餘人其秋
再出戰於達喇海口斬首六百級獲其同僉錫都等五

十四人凡三戰三捷七年練兵北平十年還鳳陽十一年卒追封杞國公謚定襄子鏞襲封十六年為征南左副將軍討平龍泉諸山寇練兵汴梁十九年與靖海侯吳楨城會州二十年從馮勝征納克楚將至金山與大軍異道相失敗沒二十三年追坐德胡惟庸黨詔書言其征西時有過被醵責遂與惟庸通謀爵除

王志臨淮人以鄉兵從太祖於濠下滁和從渡江屢騰柵先登身冒矢石授右副元帥從取常州寧國江陰復

宜興攻高郵搗九江下黃梅鏖戰鄱陽從平武昌還克
廬州敗張士誠兵追奔四十里以親軍衛指揮使改六
安衛守六安從幸汴梁渡河取懷慶澤潞留守平陽大
將軍徐達西伐會師克興元洪武三年進同知都督府
事封六安侯歲祿九百石予世券移守漢中帥兵出察
罕諾爾塞還鎮平陽復從大將軍征沙漠其後用兵西
南皆以偏將軍從雖無首功然持重未嘗敗衄其攻合
肥敗樓兒張禽吳副使為戰功第一領山西都司衛所

軍務帝稱其處置得宜十六年督兵往雲南品甸繕城
池立屯堡置驛傳安輯其民十九年卒追封許國公謚
襄簡子威二十二年嗣侯明年坐事謫安南衛指揮使
卒無子弟域嗣改清平衛世襲志亦追坐胡惟庸黨以
死不問

梅思祖夏邑人初為元義兵元帥叛從劉福通庫庫醢
其父尋棄福通歸士誠為中書左丞守淮安時徐達兵
至迎降并獻四州士誠殺其兄弟數人太祖擢思祖大

都督府副使從大軍伐吳克昇山水寨下湖州圍平江
皆有功吳平遷浙江行省右丞從大將軍伐中原克山
東取汴洛破陝州下潼關旋師徇河北至衛輝元平章
龍二棄城走彰德師從之龍二復出走遂降其城守之
畧定北平未下州郡從大軍平晉冀復從平陝西別將
克邠州獲元參政毛貴等三十人從大將軍破庫庫於
定西還自秦州破畧陽入沔州取興元洪武三年論功
封汝南侯食祿九百石予世券四年伐蜀五年征甘肅

還命巡視山陝遼東城池十四年四川水盡源通塔平
散毛諸洞長官作亂命思祖為征南副將軍與江夏侯
周德興帥兵討平之十五年復與傅友德平雲南置貴
州都司以思祖署都指揮使尋署雲南布政司事與平
章潘元明同守雲南思祖善撫輯遠人安之是年卒賜
葬鍾山之陰子義遼東都指揮使二十三年追坐思祖
胡惟庸黨滅其家思祖從子殷為駙馬都尉別有傳
金朝興巢人淮西亂聚眾結寨自保俞通海等既歸太

祖朝興亦帥衆來附從渡江征伐皆預有功克常州為
都先鋒復宜興為左翼副元帥平武昌進龍驤衛指揮
同知平吳改鎮武衛指揮使克大同改大同衛指揮使
取東勝州獲元平章劉麟等十八人洪武三年論功為
都督僉事兼秦王左相未幾解都督府事專傳王四年
從大軍伐蜀七年師至黑城獲元太尉盧巴延平章特
穆爾布哈并省院等官二十五人遂從李文忠分領東
道兵取和林語具文忠傳朝興沉勇有智畧所至以偏

師取勝雖未為大帥而功出諸將上十一年從沐英西
征收納鄰七站地明年論功封宣德侯祿二千石世襲
指揮使十五年從傅友德征雲南駐師臨安元右丞鄂
博台元帥烏哲勒圖土酋楊政俱降朝興撫輯有方軍
民咸悅進次會川卒追封沂國公謚武毅十七年論平
雲南功改錫世侯券增祿五百石長子鎮嗣封二十三
年追坐朝興胡惟庸黨降鎮平壩指揮使後從征有功
進都指揮使其後世襲衛指揮使嘉靖元年命立傅友

德梅思祖及朝興廟於雲南額曰報功

唐勝宗濠人太祖起兵勝宗年十八來歸從渡江積功
為中翼元帥從徐達克常州進圍寧國扼險力戰敗其
援兵城遂降從征婺州克之征池州力戰又敗陳友諒
兵擢龍驤衛指揮僉事從征友諒至安慶敵固守勝宗
為陸兵疑之出不意擣克其水寨從下南昌畧定江西
諸郡援安豐攻廬州戰鄱陽邀擊涇江口皆有功擢驃
騎衛指揮同知從定武昌徇長沙沅陵澧陽從徐達取

江陵還定淮東穴城克安豐迨獲元將錫都為安豐衛
指揮使守之從大將軍伐中原克汴梁歸德許州輒留
守從大軍克延安進都督府同知洪武三年冬封延安
侯食祿千五百石予世券坐擅馳驛騎奪爵降指揮捕
代縣反者久之復爵十四年浙東山寇葉丁香等作亂
命總兵討之禽賊首併其黨三千餘人分兵平安福賊
至臨安降元右丞鄂博台等十五年巡視陝西督屯田
簡軍士明年鎮遼東奉敕勿通高麗高麗使至察其奸

表聞賜敕褒美比魏田豫却烏桓賂稱名臣在鎮七年
威信大著名還帥師平貴州蠻練兵黃平於二十三年
坐胡惟庸黨誅爵除

陸仲亨濠人歸太祖從征滁州取大柳樹諸寨克和陽
擊敗元兵逐青山羣盜從渡江取太平定集慶從徐達
下諸郡縣授左翼統軍元帥從征陳友諒功多進驃騎
衛指揮使從常遇春討贛州降熊天瑞為贛州衛指揮
使節制嶺南北新附諸郡調兵克梅州會昌湘鄉悉平

諸山寨洪武元年帥衛軍與廖永忠等征廣東畧定諸
郡縣會永忠於廣州降元將盧左丞廣東平改美東衛
指揮使擢江西行省平章代鄧愈鎮襄陽改同知都督
府事三年冬封吉安侯祿千五百石予世券與唐勝宗
同坐事降指揮使捕寇雁門同復爵十二年與周德興
黃彬等從湯和練兵臨清未幾即軍中逮三人至京既
而釋之移鎮成都平巨津州叛蠻烏撒諸蠻復叛從傅
友德討平之二十三年治胡惟庸黨家奴彭特穆爾告

仲亨與勝宗費聚趙庸皆與通謀下吏訊獄具帝曰朕每怪其居貴位有憂色遂誅仲亨籍其家初仲亨年十七為亂兵所掠父母兄弟俱亡持一升麥伏草間帝見之呼曰來遂從征伐至封侯帝嘗曰此我初起時腹心股肱也竟誅死

費聚字子英五河人父德興以材勇為游徼卒聚少習技擊太祖過於濠偉其貌深相結納定遠張家堡有民兵無所屬郭子興欲招之念無可使者太祖力疾請行

偕聚騎而往步卒九人俱至寶公河望其營甚整弓弩
皆外向步卒懼欲走太祖曰彼以騎蹴我走將安往遂
前抵其營招諭已定約三日太祖先歸留聚俟之其帥
欲他屬聚還報太祖復偕聚以三百人往計縛其帥收
卒三千人豁鼻山有秦把頭八百餘人聚復招降之遂
從取靈璧克泗滁和州授承信校尉既定江東克長興
立永興翼元帥府以聚副耿炳文為元帥張士誠入寇
擊敗之召領宿衛援安豐兩定江西克武昌皆從改永

興翼元帥府為永興親軍指揮司仍副炳文為指揮同知士誠復入寇獲其帥宋興祖再敗之士誠奪氣不敢復窺長興隨征淮安湖州平江皆有功進指揮使湯和討方國珍聚以舟師從海道邀擊浙東平復由海道取福州破延平歸次昌國剿海寇葉陳二姓於蘭秀山至是聚始獨將洪武二年會大軍取西安改西安衛指揮使進都督府僉事鎮守平涼三年封平涼侯歲祿千五百石予世券時諸將在邊屯田募伍歲有常課聚頗耽

酒色無所事事又以招降無功召還切責之明年從傅友德征雲南大戰白石江禽達爾瑪雲南平進取大理未幾諸蠻復叛命副安陸侯吳復為總兵授以方畧分攻關索嶺及阿咱等寨悉下之蠻地始定置貴州都指揮使司以聚署司事十八年命為總兵官帥指揮丁忠等征廣南禽和爾丹俘其衆萬人還鎮雲南二十三年召還李善長敗語連聚帝曰聚曩使姑蘇不稱旨朕嘗詈責遂欲反耶竟坐黨死爵除子超征方國珍沒於陣

璿以人材舉官江西參政孫宏從征雲南積功為右衛指揮使坐奏對不實戍金齒

陸聚不知何許人元樞密院同知托克托敗芝蔴李於徐州彭大等奔濠聚撫戢流亡繕城保境寇不敢犯徐達經理江淮聚以徐宿二州降太祖嘗詔二州吾桑梓地未忍加兵及歸附大悅以聚為江南行省參政仍守徐州遣兵畧定沛魚臺邳蕭宿遷睢寧庫庫遣李左丞侵徐駐陵子村聚遣指揮傅友德擊之俘其衆禽李左

丞又敗元兵於宿州禽僉院邢端等從定山東平汴梁
還鎮改山東行省參政從平元都畧大同保定真定攻
克車子山及鳳山城山鐵山諸寨分守井陘故關會師
陝西克承天寨聚所部皆淮北勁卒雖燕趙精騎不及
也北征沂邳山民乘間作亂召聚還討平之洪武三年
封河南侯歲祿九百石予世券八年同衛國公愈屯田
陝西置衛戍守十二年同信國公和練兵臨清尋理福
建軍務召還賜第鳳陽二十三年坐胡惟庸黨死爵除

鄭遇春濠人與兄遇霖俱以勇力聞遇霖與里人有卻
欲殺之遇春力護得解衆皆畏遇霖而以遇春為賢太
祖下滁州遇霖為先鋒取鐵佛岡三汊河大柳等寨遇
春亦累功至總管攻蕪湖霖戰死遇春遂領其衆時諸
將所部不過千人遇春兼兩隊而所部尤驍果累戰功
多授左翼元帥從平陳友諒先士卒未嘗身自言功太
祖異之取六安為六安衛指揮僉事從大將軍定山東
河南北克朔州改朔州衛指揮副使洪武三年進同知

大都督府封滎陽侯歲祿九百石予世券明年又命駐
臨濠開行大都督府坐累奪爵尋復之復守朔州從傅
友德平雲南帥楊文等經畧城池屯堡還京督金吾諸
衛造海船百八十艘運餉遼東籍陝西岷州諸衛官馬
二十三年坐胡惟庸黨爵除

黃彬江夏人從歐晉祥攻陷袁吉屬縣徐壽輝以晉祥
守袁州及陳友諒殺壽輝僭偽號彬言於晉祥曰公與
友諒比肩奈何下之友諒驕恣非江東敵也保境候東

師當不失富貴普祥遂遣使納款友諒遣弟友仁攻之
彬與普祥敗其衆獲友仁友諒懼約分界不相犯乃釋
友仁時江楚諸郡皆為陳氏有袁扼其要害潭岳贛兵
不得出友諒勢大蹙太祖兵臨之遂棄江州彬力也太
祖至龍興令普祥仍守袁州而以彬為江西行省參政
未幾普祥死彬領其衆普祥故殘暴彬盡反所為民甚
安之從常遇春征贛州饒鼎臣據吉安為熊天瑞聲援
遇春兵至鼎臣走安福彬以兵躡之鼎臣走茶陵天瑞

乃降永新守將周安叛彬從湯和執安鼎臣亦殪移鎮
袁州招集諸山寨江西悉定進江淮行省中書左丞洪
武三年封宜春侯歲祿九百石子世券四年贛州上猶
上寇叛討平之五年古州等洞蠻叛以鄧愈為征南將
軍三道出師彬與營陽侯璟出澧州師還賜第中都明
年從徐達鎮北平出練兵沂州臨清二十三年坐胡惟
庸黨死爵除

葉昇合肥人左君弼據廬昇自拔來歸以右翼元帥從

征江州以指揮僉事從取吳以府軍衛指揮使從定明
州洪武三年論功僉大都督府事明年從征西將軍湯
和以舟師取蜀越二年出為都指揮使鎮守西安討平
慶陽叛寇十二年復僉大都督府事西番叛與都督王
弼征之降切實嘉平其部落復討平延安巴延特穆爾
禽洮州番酋論功封靖寧侯歲祿二千石世指揮使鎮
遼東修海蓋復三城在鎮六年邊備修舉外寇不敢犯
發高麗賂遺帝屢賜敕與唐勝宗同褒二十年命同普

定侯陳桓總制諸軍於雲南定邊姚安立營屯田經理
畢節衛明年東川龍海諸蠻叛昇以參將從沐英討平
之已而湖廣安福所千戶夏德忠誘九溪洞蠻為寇昇
同胡海等討之潛兵出賊後掩擊禽德忠立永定九溪
二衛因留屯襄陽贛州山賊復結湖廣峒蠻為寇昇為
副將軍同胡海等討平之俘獲萬七千人昇凡三平叛
蠻再出練兵甘肅河南二十五年八月坐交通胡惟庸
事覺誅死涼國公藍玉昇姻也玉敗復連及昇以故名

隸兩黨云

贊曰諸將當草昧之際上觀天命委心明主戰勝攻取
克建殊勲皆一時之智勇也及海內寧謐乃名隸黨籍
或追論或身坐鮮有能自全者圭裳之錫固足酬功而
礪帶之盟不克再世亦可慨矣夫

明史卷一百三十一

欽定四庫全書

明史卷一百三十一考證

郭興傳三年為秦王武傳

臣嚴福按職官志洪武三

年置王相府有文武相有文傳與武傳之名蓋始於

此謹附識

陳德傳王志傳臨淮人

臣嚴福按臨淮即濠州屬縣

考明功臣封爵考明書開國臣傳皆以志為濠人史

作臨淮人文法小異非舛訛也謹識

王志傳明年坐事謫安南衛指揮使

臣嚴福按王志

子威所坐之事考開國臣傳及功臣封爵考均以為坐林來保事史不詳原委謹識之

費聚傳字子英五河人

臣

嚴福按費聚明功臣封爵

考及明書均作濠人史作五河人未知何據但他書無可證謹識

費聚傳竟坐黨死爵除

臣

嚴福按明功臣封爵考平

涼侯費聚雖坐胡黨後竟得釋史作坐黨死或別有

所據耶謹識

陸聚傳二十三年坐胡惟庸黨死

臣嚴福按開國臣

傳陸聚既坐胡惟庸黨太祖念其為奸人所誘宥之
尋卒史併其文似與諸黨人同矣謹識

黃彬傳出練兵沂州臨清二十三年坐胡惟庸黨死

臣

嚴福按黃彬坐胡惟庸黨事明功臣封爵考載其

平日未嘗有過太祖念而宥之居數年卒史牽連書

死不知何據謹識

明史卷一百三十一考證

欽定四庫全書薈要卷六千七百二十五 史部

明史卷一百三十二

大學士張廷玉等奉勅修

列傳第二十

朱亮祖

周德興

王弼

藍玉
曹震張翼
張溫陳桓

朱壽
曹興

謝成

李新

朱亮祖六安人元授義兵元帥太祖克寧國禽亮祖喜其勇悍賜金幣仍舊官居數月叛歸於元數與我兵戰為所獲者六千餘人遂入宣城據之太祖方取建康未暇討也已遣徐達等圍之亮祖突圍戰常遇春被創而還諸將莫敢前太祖親往督戰獲之縛以見問曰爾將何如對曰生則盡力死則死耳太祖壯而釋之累功授樞密院判從下南昌九江戰鄱陽湖下武昌進廣信衛指揮使李文忠破李伯昇於新城亮祖乘勝燔其營落

數十獲同僉元帥等六百餘人軍士三千馬八百匹輜
重鎧甲無算伯昇僅以數騎遁太祖嘉其功賜賚甚厚
胡深請會兵攻陳友定亮祖由鉛山進取浦城克崇安
建陽功最多會攻桐廬圍餘杭遷浙江行省參政副李
文忠守杭州帥馬步舟師數萬討方國瑛下天台進攻
台州國瑛出走追至黃巖降其守將哈喇婁徇下仙居
諸縣進兵溫州方明善拒戰擊敗之克其城徇下瑞安
復敗明善於盤嶼追至楚門國瑛及明善詣軍降洪武

元年副征南將軍廖永忠由海道取廣東何真降悉定其地進取廣西克梧州元尚書布延特穆爾戰死遂定鬱林潯貴諸郡與平章楊璟會師攻克靖江同廖永忠克南寧象州廣西平班師太子帥百官迎勞龍灣三年封永嘉侯食祿千五百石予世券四年伐蜀帝以諸將久無功命亮祖為征虜右副將軍濟師至蜀而明昇已降徇下未附州縣師還以擅殺軍校不預賞八年同傅友德鎮北平還又同李善長督理屯田巡海道十二年

出鎮廣東亮祖勇悍善戰而不知學所為多不法番禺知縣道同以聞亮祖誣奏同同死事見同傳帝尋悟明年九月召亮祖至與其子府軍衛指揮使暹俱鞭死御製壙誌仍以侯禮葬二十三年追論亮祖胡惟庸黨次子昱亦坐誅

周德興濠人與太祖同里少相得從定滁和渡江累戰皆有功遷左翼大元帥從取金華安慶高郵援安豐征廬州進指揮使從討贛州安福永新拔吉安進湖廣行

省左丞同楊璟討廣西攻永州元平章阿爾薩蘭及周
文貴自全州來援德興再擊敗之斬朱院判追奔至全
州遂克之道州寧州藍山皆下進克武岡州分兵據險
絕靖江聲援廣西平功多洪武三年封江夏侯歲祿千
五百石予世券是歲慈利土酋覃垕連茅岡諸寨為亂
長沙洞苗俱煽動太祖命德興為征蠻將軍帥師討平
之明年伐蜀副湯和為征西左將軍克保寧先是傅友
德已克階文而和所帥舟師未進及保寧下兩路軍始

合蜀平論功帝以和功由德興賞德興而面責和且追數征蠻事謂覃垕之後楊璟不能克趙庸中道返功無與德興比者復副鄧愈為征南左將軍帥趙庸左君弼出南寧平婪鳳安田諸州蠻克泗城州功復出諸將上賞倍於大將命署中立府行大都督府事德興功既盛且恃帝故人營第宅踰制有司列其罪詔特宥之十三年命理福建軍務旋召還明年五溪蠻亂德興已老力請行帝壯而遣之賜手書曰趙充國圖征西羌馬援請

討交趾朕常嘉其事謂今人所難卿忠勤不怠何忝前
賢靖亂安民在此行也至五溪蠻悉散走會四川水盡
源通塔平諸洞作亂仍命德興討平之十八年楚王楨
討思州五開蠻復以德興為副將軍德興在楚久所用
皆楚卒威震蠻中定武昌等十五衛歲練軍士四萬四
千八百人決荊州嶽山壩以溉田歲增官租四千三百
石楚人德之還鄉賜黃金二百兩白金二千兩文綺百
匹居無何帝謂德興福建功未竟卿雖老尚勉為朕行

德興至閩按籍僉練得民兵十萬餘人相視要害築城一十六置巡司四十有五防海之策始備逾三年歸第復令節制鳳陽留守司并訓練屬衛軍士諸勲臣存者德興年最高歲時入朝賜予不絕二十五年八月以其子驥亂宮并坐誅死

王弼其先定遠人後徙臨淮善用雙刀號雙刀王初結鄉里依三臺山樹柵自保踰年帥所部來歸太祖知其才使備宿衛破張士誠兵於湖州取池州石埭攻婺源

州斬守將特穆爾布哈拔其城獲甲三千擢元帥下蘭
溪金華諸暨援池州復太平下龍興吉安大戰鄱陽邀
擊陳友諒於涇江口從平武昌還克廬州拔安豐破襄
陽安陸取淮東克舊館降士誠將朱暹遂取湖州遷驍
騎右衛親軍指揮使進圖平江弼軍盤門士誠親帥銳
士突圍出西門搏戰將奔常遇春軍遇春分兵北濠截
其後而別遣兵與戰士誠軍殊死鬪遇春拊弼背曰軍
中皆稱爾健將能為我取此乎弼應曰諾馳騎揮雙刀

奮擊敵小却遇春帥衆乘之吳兵大敗人馬溺死沙盆
潭者甚衆士誠馬逸墮水幾不救肩輿入城自是不敢
復出吳平賞賚甚厚從大軍征中原下山東略定河南
北遂取元都克山西走庫庫自河中渡河克陝西進征
察罕諾爾師還洪武三年授大都督府僉事世襲指揮
使十一年副西平侯沐英征西番降朵甘諸酋及洮州
十八族殺獲甚衆論功封定遠侯食祿二千石十四年
從傅友德征雲南至大理土酋段世訖龍尾闕弼以兵

由泅水趨上關與沐英兵夾擊之拔其城禽段世鶴慶
麗江諸郡以次悉平加祿五百石予世券二十年以副
將軍從馮勝北伐降納克楚明年復以副將軍從藍玉
出塞深入不見敵玉欲引還弼持不可玉從之進至捕
魚兒海以弼為前鋒直薄敵營走元嗣主特古斯特穆
爾盡獲其輜重語在玉傳二十三年奉詔還鄉二十五
年從馮勝傳友德練軍山西河南明年同召還先後賜
死爵除弼子六人女為楚王妃

藍玉定遠人開平王常遇春婦弟也初隸遇春帳下臨敵勇敢所向皆捷遇春數稱於太祖由管軍鎮撫積功至大都督府僉事洪武四年從傅友德伐蜀克綿州五年從徐達北征先出雁門敗元兵於亂山再敗之於圖拉河七年帥兵拔興和獲其國公特爾墨齊等五十九人十一年同西平侯沐英討西番禽其酋三副使斬獲千計明年師還封永昌侯食祿二千五百石予世券十四年以征南右副將軍從潁川侯傅友德征雲南禽元

平章達爾瑪於曲靖梁王走死滇地悉平王功為多益
祿五百石冊其女為蜀王妃二十年以征虜左副將軍
從大將軍馮勝征納克楚次通州聞元兵有屯慶州者
王乘大雪帥輕騎襲破之殺平章郭勒禽其子布喇奇
還會大軍進至金山納克楚遣使詣大將軍營納款王
往受降納克楚以數百騎至王大喜飲以酒納克楚酌
酒酬王王解衣衣之曰請服此而飲納克楚不肯服王
亦不飲爭讓久之納克楚覆酒於地顧其下咄咄語將

脫去鄭國公常茂在坐直前砍傷之都督耿忠擁以見
勝其衆驚潰遣降將古通諭降之還至伊瑪河悉降其
餘衆會馮勝有罪收大將軍印命王行總兵官事尋即
軍中拜王為大將軍移屯薊州時順帝孫特古斯特穆
爾嗣立擾塞上二十一年三月命王帥師十五萬征之
出大寧至慶州諜知元主在捕魚兒海間道兼程進至
百眼井去海四十里不見敵欲引還定遠侯王弼曰吾
輩提十餘萬衆深入漠北無所得遽班師何以復命王

曰然令軍士穴地而爨毋見烟火乘夜至海南敵營尚在
海東北八十餘里王令弼為前鋒疾馳薄其營敵謂
我軍乏水草不能深入不設備又大風揚沙晝晦軍行
敵無所覺猝至前大驚迎戰敗之殺太尉曼濟等降其
衆元主與太子天保努數十騎遁去王以精騎追之不
及獲其次子地保努妃公主以下百餘人又追獲吳王
多爾濟代王達爾瑪及平章以下官屬三千人男女七
萬七千餘人並寶璽符敕金牌金銀印諸物馬駝牛羊

十五萬餘焚其甲仗蓄積無算奏捷京師帝大喜賜敕褒勞比之衛青李靖又破哈喇章營獲人畜六萬師還進涼國公明年命督修四川城池二十三年施南忠建二宣撫司蠻叛命王討平之又平都勻安撫司散毛諸洞益祿五百石詔還鄉二十四年命王理蘭州莊浪等七衛兵以追逃寇祁者孫遂略西番罕東之地土酋哈爾吉等遁會建昌指揮使伊嚕特穆爾叛詔移兵討之至則都指揮瞿能等已大破其衆伊嚕走柏興州王遣

百戶毛海誘縛其父子送京師誅之而盡降其衆因請
增置屯衛報可復請籍民為兵討朶甘百夷詔不許遂
班師王長身頰面饒勇略有大將才中山開平既沒數
總大軍多立功太祖遇之厚寢驕蹇自恣多蓄莊奴假
子乘勢暴橫嘗佔東昌民田御史按問王怒逐御史北
征還夜扣喜峰關關吏不時納縱兵毀關入帝聞之不
樂又人言其私元主妃妃慚自經死帝切責王初帝欲
封王梁國公以過改為涼仍鐫其過於券王猶不悛侍

宴語傲慢在軍擅黜陟將校進止自專帝數譙讓西征
還命為太子太傅王不樂居宋潁兩公下曰我不堪太
師耶比奏事多不聽益怏怏二十六年二月錦衣衛指
揮蔣瓖告王謀反下吏鞠訊獄辭云王同景川侯曹震
鶴慶侯張翼舳艫侯朱壽東莞伯何榮及吏部尚書詹
徽戶部侍郎傅友文等謀為變將伺帝出藉田舉事獄
具族誅之列侯以下坐黨夷滅者不可勝數手詔布告
天下條列爰書為逆臣錄至九月乃下詔曰藍賊為亂

謀泄族誅者萬五千人自今胡黨藍黨概赦不問胡謂丞相惟庸也於是元功宿將相繼盡矣凡列名逆臣錄者一公十三侯二伯葉昇前坐事誅胡玉等諸小侯皆別見其曹震張翼張溫陳桓朱壽曹興六侯附著左方曹震濠人從太祖起兵累官指揮使洪武十二年以征西番功封景川侯祿二千石從藍玉征雲南分道取臨安諸路至威楚降元平章閻魯瑪岱等雲南平因請討容美散毛諸洞蠻及西番朵甘思曩日諸族詔不許又

請以貴州四川二都司所易番馬分給陝西河南將士
又言四川至建昌驛道經大渡河往來者多死瘴癘詢
父老自岷州峨嵋至建昌有古驛道平易無瘴毒已令
軍民修治請以瀘州至建昌驛馬移置峨嵋新驛從之
二十一年與靖寧侯葉昇分道討平東川叛蠻俘獲五
千餘人尋復命理四川軍務同藍玉覈征南軍士會永
寧宣慰司言所轄地有百九十灘其八十餘灘道梗不
利詔震疏治之震至瀘州按視有支河通永寧乃鑿石

削崖令深廣以通漕運又闢陸路作驛舍郵亭駕橋立
棧自茂州一道至松潘一道至貴州以達保寧先是行
人許穆言松州地磽瘠不宜屯種戍卒三千糧運不給
請移戍茂州俾就近屯田帝以松州控制西番不可動
至是運道既通松潘遂為重鎮帝嘉其勞踰年復奏四
事一請於雲南大寧境就井煮鹽募商輸粟以贍邊一
令商入粟雲南建昌給以重慶綦江市馬之引一請蠲
馬湖逋租一施州衛軍儲仰給湖廣沂江險遠請以重

慶粟順流輸之皆報可震在蜀久諸所規畫並極周詳
蜀人德之藍玉敗謂與震及朱壽誘指揮莊成等謀不
軌論逆黨以震為首並其子炳誅之張翼臨淮人父聚
以前翼元帥從平江南淮東積功為大同衛指揮同知
致仕翼隨父軍中驍勇善戰以副千戶嗣父職從征陝
西禽叛寇擢都指揮僉事進僉都督府事從藍玉征雲
南克普定曲靖取鶴慶麗江勦七百房山寨擣劍川擊
石門十七年論功封鶴慶侯祿二千五百石予世券二

十六年坐玉黨死張溫不詳何許人從太祖渡江授千
戶積功至天策衛指揮僉事從大軍收中原克陝西攻
下蘭州守之元將庫庫偵大將軍南還自甘肅帥步騎
奄至諸將請固守以待援溫曰彼遠來未知我虛實乘
暮擊之可挫其銳倘彼不退固守未為晚也於是整兵
出戰元兵少却已而圍城數重溫歛兵固守敵攻不能
下乃引去太祖稱為奇功擢大都督府僉事已又命兼
陝西行都督府僉事當蘭州之受圍也元兵乘夜梯城

而登千戶郭佑被酒卧他將巡城者擊退之圍既解溫
將斬佑天策衛知事朱有聞爭曰當賊犯城時將軍斬
佑以令衆軍法也賊既退始追慘之無及於事且有擅
殺名溫謝曰非君不聞是言遂杖佑釋之帝聞而兩善
焉并賞有聞綺帛其明年以參將從傅友德伐蜀功多
十一年以副將會王弼等討西羌明年論功封會寧侯
祿二千石又明年命往理河南軍務十四年從傅友德
征雲南二十年秋帥師討納克楚餘衆從北伐皆有功

後以居室器用僭上獲罪遂坐玉黨死陳桓濠人從克
滁和渡江克集慶先登從取寧國金華戰龍江彭蠡收
淮東浙西平中原累功授都督僉事洪武四年從伐蜀
十四年從征雲南與湖海郭英帥兵五萬由永寧趨烏
撒道險隘自赤河進師與烏撒諸蠻大戰敗走之再破
芒部土酋走元右丞實保遂城烏撒降東川烏蒙諸蠻
進克大理略定汝寧靖寧諸州邑十七年封普定侯祿
二千五百石子世券二十年同靖寧侯葉昇征東川俘

獲甚衆就令總制雲南諸軍再平九溪洞蠻立營堡屯
田還坐玉黨死朱壽未詳何許人以萬戶從渡江下江
東郡邑進總管收常婺克武昌平蘇湖轉戰南北積功
為橫海衛指揮進都督僉事與張赫督漕運有功洪武
二十年封舳艫侯祿二千石子世泰坐玉黨死曹興一
名興才未詳何許人從平武昌授指揮僉事取平江進
指揮使克蘇九疇炭山寨進都督僉事兼太原衛指揮
進山西行省參政領衛事為晉王相洪武十一年從沐

英討洮州羌降朵甘酋禽三副使等師還封懷遠侯世襲指揮使理軍務山西從北征有功後數年坐玉黨死同時以黨連坐者都督則有黃輅湯泉馬俊王誠聶緯王銘許亮謝熊汪信蕭用楊春張政祝哲陶文節昂凡十餘人多玉部下偏裨於是勇力武健之士芟夷略盡罕有存者

謝成濠人從克淶和渡江定集慶授總管克寧國婺州進管軍千戶戰鄱陽平武昌下蘇湖進指揮僉事從大

軍征中原克元都攻慶陽擣定西為都督僉事晉王府相從沐英征朵甘降切實嘉平洮州十八族洪武十二年封永平侯祿二千石世指揮使二十年同張溫追討納克楚餘衆召還二十七年坐事死沒其田宅

李新濠人從渡江數立功戰龍灣授管軍副千戶取江陵進龍驤衛正千戶從克平江遷神武衛指揮僉事調守茶陵衛屢遷至中軍都督府僉事十五年以營孝陵封崇山侯歲祿千五百石二十二年命改建帝王廟於

雞鳴山新有心計將作官吏視成畫而已明年遣還鄉
頒賜金帛田宅時諸勲貴稍僭肆帝頗嫉之以黨事緣
坐者衆新首建言公侯家人及儀從戶各有常數餘者
宜歸有司帝是之悉發鳳陽隸籍為民命禮部纂稽制
錄嚴公侯奢侈踰越之禁於是武定侯英還佃戶輸稅
信國公和還儀從戶曹國公景隆還莊田皆自新發之
二十六年督有司開脂胭河於溧水西達大江東通兩
浙以濟漕運河成民甚便之二十八年以事誅

贊曰治天下不可以無法而草昧之時法尚疎承平之
日法漸密固事勢使然論者每致慨於烏盡弓藏謂出
於英主之猜謀殊非通達治體之言也夫當天下大定
勢如磐石之安指麾萬里奔走恐後復何所疑忌而莫
難之不遺餘力哉亦以介冑之士桀驁難馴乘其鋒銳
皆能豎尺寸於疆場迨身處富貴志滿氣溢近之則以
驕恣啟危機遠之則以怨望扞文網人主不能廢法而
曲全之亦出於不得已而非以剪除為私計也亮祖以

下諸人既昧明哲保身之幾又違制節謹度之道駢首就僂亦其自取焉爾

明史卷一百三十二

欽定四庫全書

明史卷一百三十二考證

周德興傳蜀平論功帝以和功由德興賞德興而面責
和臣嚴福按德興于平蜀後有代俞通源督田鳳
陽之役明功臣封爵考開國臣傳明書均載之史獨
畧書謹附識

明史卷一百三十二考證